



a cura di Isabella Descalzo

Silvia Bottaro, Raffaello Resio (1855-1927) - Scenari d'Arte, Savona, Editoriale Darsena, 2012, pagg. 159

Tanti son i pitòi che han onorù a nostra tàera de Liguria. O Resio, zeneize de nascita e ativo in tutta a nostra region sorvatùtto inta provinsa de Sann-a inta seconda meitàe do secolo XIX, o se còloca con raxon fra i ciù rappresentativi e prolifici. Vasta a seu produçion, specialmente quella religioza che o vedde presente co-e seu opere in tante gexe da-o Levante a-o Ponente. A seu figûa artistica a vegne feua da 'n pasùo ricco de sugestioin che questo libro o ne fa vive e conosce co-a proposta de 'n percorso artistico ben ben interessante, ch'ò ne porta a-a scoperta de 'n grande pitò ligure che tanti no conoscian ancon e che fòscia o no l'è conscideròu comme giustamente o meritèiva. A dotoressa Bottaro a contriboisce a fàne fa a seu conoscenza e l'è veramente 'n piaxe, pe l'animo e pe-a vista. Bonn-a letûa!



Angela Valenti Durazzo, Il Fratello del Doge, Brescia, Masetti Rodella Editori, 2012, pagg. 339

A stòia de l'ùrtimo periodo de vitta da nostra glorioza Repubblica a vegne feua con tutta a seu fòrsa da questo libro ch'ò ne conta in mòddo mirabile e vicende do Giacomo Durazzo e da seu famiggia: da Zena fin a-a corte de Vienna pe arivà a Venecia. Ne vegne feua 'n ritræto de 'na societæ viva, dinamica e inportante ch'a ne rende tutti orgogliosi do nostro pasùo e ch'a ne convinse senpre de ciù de l'inportansa de mantegnìlo vivo. Questo libro o ne porta a conosce tanti aspètti, a volte anche coixi e divertenti, da vitta de questi personaggi, che no tutti cono-

scian comme se dovieiva. E o-o fa in mòddo originale, ma senpre tegnìndo prezente o senso d'apartenensa e a consapevolessa d'èse figgi de 'na citæ che, fòscia, ancheu a l'à perdùo in pitin questo sentimento, ma che o libro in question o ne riporta in tutta a seu inportansa. Tutti doviéivan avei senpre prezente, pe poei vive o nostro prezente ben, a pinn-a consapevolessa de quello ch'ò l'è stæto o nòstro pasùo.



Centro studi Storie di Jeri, Quaderni di storia locale – Volume VII, 2012, pagg. 236

O *Centro Studi Storie di Jeri* ò l'è nasciuo do 2006 a Bogiasco pe fà de riçerche storiche in scì comuin de Bogiasco, Ceive e Söi, e l'è za 'na bella còsa che trei comuin se sègian missi insemme.

Da-o travaggio de 'na dexenn-a de personn-e, con anche di contributi esterni, l'è za sciortìo inte questi anni sei *Quaderni di storia locale*, e questo ò l'è o setén: drento gh'è tante notiçe interessanti, in scì argomenti ciù diversi, senpre tratæ con doviçia de particolari e ben documentæ, anche con tante belle figûe in gianco e neigro. L'otò de l'urtimo capitolo ò l'è un figioâme de unz'anni, ch'ò ne conta di gîi con seu nonno pe avistâ i òxèlli (co-ina parolla foresta, *birdwatching*), e chi e beliscime fotografie én a colori.

